



Svi detalji velike akcije SIPA-e u Sarajevu, Mostaru i Bugojnu

U 'Liftu' palo šest osoba zbog šverca oružja

Uhapšeni H. H., M. S., M. Š., M. P., N. P. i M. M. • Najveća količina oružja pronađena u Mostaru

S. DEGIRMENDZIC

Pripadnici Državne agencije za istrage i zaštitu (SIPA) uhapsili su jučer u akciji kodnog naziva „Lift“ šest osoba osumnjičenih za krijumčarenje oružja na području BiH, Srbije i Njemačke. Na području Sarajeva, Mostara i Bugojna uhapšeni su H. H. (1983.), M. S. (1961.), M. Š. (1959.), M. P. (1978.), N. P. (1957.) i M. M. (1978.). Hapšenja su izvedena po nalogu Tužilaštva BiH, koje je pak u ranijem saopćenju objavilo da je uhapšeno pet osoba.

Organizirana grupa

Oni se terete da su, djelujući kao organizirana skupina, u više navrata organizirali krijumčarenje i prodaju u BiH, kao i krijumčarenje na područje Njemačke i Srbije, veće količine oružja, uglavnom pištolja te streljiva i druge vojne opreme, koju su prodavali njima poznatim osobama na ilegalnom tržištu - saopćili su iz SIPA-e.

Prema saznanjima „Avaza“, najveća količina oružja pronađena je tokom pretresa prostora i vozila koje koriste osumnjičeni u Mostaru. Kako je saopćeno iz Tužilaštva BiH, zaplijenjeno oružje trebalo je završiti u rukama počinitelja raznih krivičnih djela, čime se nanosi velika opasnost za opću sigurnost građana u BiH i inozemstvu.

Osumnjičeni su da su, djelujući kao organizirana skupina, tokom 2015. vršili organizirano krijumčarenje oružja, u najvećoj mjeri pištolja te streljiva i vojne opreme, čije držanje i nabavka ni pod kojim uvjetima nije dozvoljena civilima - naveli su iz Tužilaštva BiH.

Naveli su i da se intenzivne aktivnosti u borbi protiv međunarodnog krijumčarenja oružja, koje kriminogene strukture koriste u izvršenju krivičnih djela, provodi u saradnji s policijskim i sigurnosnim strukturama zemalja regiona i Evropske unije.

Poznate rute

Jučerašnje hapšenje u BiH, kako saznaje „Avaz“ iz

policijskih izvora, ima veze više nedavno provedenih policijskih akcija protiv šverca oružja u BiH, Srbiji, Njemačkoj i Sloveniji. Navodno su dvojica uhapšenih u Novom Sadu prije tri dana uhvaćena s većom količinom eksploziva, pušaka i municije za koje se pretpostavlja da su bili namijenjeni teroristima u Francuskoj, bili dio kriminalne grupe iz Beograda koja ja saradivala sa švercerima oružja iz BiH.

Jučerašnja akcija, saznajemo, dovela je do novih saznanja o rutama šverca iz BiH u zapadnoevropske zemlje, od kojih jedna ide od Sarajeva preko Mostara do hrvatskih luka na Jadranu, gdje oružje ukrcavaju na brodove. Druga ide kopnenim putem, od Sarajeva preko Bihaća ili Bosanske Gradiške za Hr-

vatsku, a potom preko Slovenije u zapadnu Evropu.

Naši izvori tvrde da jučerašnja akcija ima veze i s hapšenjem Senada Rašidovića. On je uhapšen u oktobru na granici Hrvatske sa Slovenijom kada je uhvaćen u pokušaju krijumčarenja oružja u Francusku.

Krijumčari pali jučer u „Liftu“ ustvari su, prema tvrdnjama našeg izvora, nastavili posao krijumčarenja oružja koji su ranije obavljali uhapšeni u međunarodnoj akciji „Sjever“ provedenoj u septembru ove godine, kada je u BiH i Njemačkoj uhapšeno šest osoba, svi bh. državljanji, među kojima je i Dalibor Čurlik, pripadnik CJB Banja Luka.



Oružje oduzeto u jučerašnjoj akciji SIPA-e



Višemjesečno planiranje

Saznajemo da je akcija „Lift“ planirana mjeseci-ma, a trebala bi biti samo jedan od pokazatelja da je BiH čvrsto opredijeljena da se uhvati ukoštac s problemom krijumčarenja oružja iz naše u zemlje zapadne Evrope. S tim u vezi, ona bi trebala biti i

odraz nedavnih izjava ministra sigurnosti BiH Dragana Mektića, koji je za „Avaz“ kazao da bi BiH vrlo brzo mogla postati lider i centar iz kojeg bi se koordinirale zajedničke aktivnosti u regionu kada je u pitanju borba protiv krijumčarenja oružja.

Međunarodne akcije

- **2005.** francuska policija uhapsila grupu državljana BiH zbog krijumčarenja naoružanja. Istraga pokazala da velike količine oružja i eksploziva iz BiH stižu u zapadnoevropske zemlje, prvenstveno u Njemačku, Italiju, Francusku, Španiju

- **2008.** policije šest evropskih država izvele akciju “Zapad” radi presijecanja lanca kriju-

mčarenja oružja iz BiH u EU. Šef grupe bio Velimir Mihajlović iz Banje Luke

- **2008.** u međunarodnoj policijskoj akciji “Viking” uhapšeno 19 osoba zbog šverca oružja iz BiH u Švedsku

- **2010.** pro-nađene “zolje” kod sudnice u Rimu koje su pripadale kalabrijskoj mafiji “Ndrangeta”, a porijeklom su iz BiH